

NACRT

ZAKON O VJEŠTACIMA

Brčko, april 2025. godine

Na osnovu člana 22. Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na _____. redovnoj sjednici održanoj dana _____ godine, usvaja

ZAKON O VJEŠTACIMA

I DIO – OSNOVNE ODREDBE

Član 1. (Predmet)

Ovim zakonom propisuju se uslovi za obavljanje poslova vještačenja, postupak imenovanja i razrješenja vještaka, postupak upisa i brisanja pravnih subjekata, prava i obaveze lica koja obavljaju vještačenje, kao i druga pitanja od značaja za obavljanje poslova vještačenja.

Član 2. (Poslovi vještačenja)

- (1) Vještačenje vrše subjekti koji ispunjavaju uslove propisane ovim zakonom i to:
 - fizička lica,
 - organi vlasti i javne ustanove u Bosni i Hercegovini koji u okviru zakonom propisanih ovlaštenja vrše poslove vještačenja i
 - privatne ustanove i privredna društva koja su registrovana za poslove vještačenja.
- (2) Vještak obavlja poslove vještačenja samostalno ili u ime organa vlasti i javne ustanove u Bosni i Hercegovini koje u okviru zakonom propisanih ovlaštenja vrše poslove vještačenja, te u ime privatne ustanove i privrednog društva koji su registrovani za poslove vještačenja.
- (3) Poslove vještačenja iz ovog zakona može obavljati i vještak koji se nalazi na bilo kojoj listi vještaka nadležnog organa u Bosni i Hercegovini iz oblasti za koje se imenuje vještak.
- (4) U situaciji kada u Bosni i Hercegovini nema ovlaštenog subjekta za vršenje poslova vještačenja iz specifične stručne oblasti ili ako za to postoje pravni ili stvarni razlozi, vještačenje se može povjeriti i subjektu iz druge države ako po zakonu te države ispunjava uslove za obavljanje poslova vještačenja.
- (5) Naučne i stručne ustanove (fakulteti, instituti, klinički centri i sl.), organi vlasti i javne ustanove, te privredna društva koja su registrovana za poslove vještačenja, kada vrše vještačenje, određuju jednog ili više stručnjaka odgovarajuće specijalnosti ili

obrazuju komisije ili odbore sastavljene od naučnih i stručnih radnika koji su zaposleni kod njih a koji će izvršiti vještačenje.

(6) Imenovanje vještaka za obavljanje poslova vještačenja, vrši se za:

- a) oblast sudske medicine i drugih medicinskih oblasti - sa podoblastima i specijalnostima,
- b) oblast farmacije – sa podoblastima,
- c) oblast stomatologije - sa podoblastima,
- č) oblast veterinarstva - sa podoblastima i specijalnostima,
- ć) kriminalističko-forenzičku oblast - sa podoblastima,
- d) grafičko-tehnološku oblast - sa podoblastima,
- dž) pedagošku oblast - sa podoblastima,
- đ) psihološku oblast - sa podoblastima,
- e) elektrotehničku oblast - sa podoblastima,
- f) oblast mašinstva - sa podoblastima,
- g) ekonomsku oblast - sa podoblastima,
- h) oblast šumarstva - sa podoblastima,
- i) oblast arhitekture i urbanizma - sa podoblastima,
- j) oblast građevinarstva - sa podoblastima,
- k) oblast geodezije - sa podoblastima,
- l) oblast saobraćaja - sa podoblastima,
- lj) hemijsko-tehnološku oblast - sa podoblastima,
- m) oblast biologije - sa podoblastima,
- n) oblast geologije - sa podoblastima,
- nj) oblast poljoprivrede - sa podoblastima,
- o) oblast zaštite na radu - sa podoblastima,
- p) oblast zaštite od požara - sa podoblastima,
- r) oblast zaštite životne sredine - sa podoblastima,
- s) oblast informatičko-telekomunikacijske tehnologije - sa podoblastima i
- š) druge oblasti sa podoblastima i specijalnostima, zasnovanim na naučno-stručnim dostignućima i potrebama postupka o čemu na prijedlog zainteresovane strane ili po službenoj dužnosti posebnu odluku donosi Pravosudna komisija Brčko distrikta Bosne i Hercegovine (u daljem tekstu: Pravosudna komisija).

Član 3. (Rodna jednakost)

Izrazi koji se u ovom zakonu koriste za fizičko lice u muškom rodu podrazumijevaju iste izraze u ženskom rodu i obrnuto.

II DIO - USLOVI I POSTUPAK IZBORA I IMENOVANJA VJEŠTAKA

Član 4. (Uslovi za imenovanje vještaka)

(1) Za vještaka može biti imenovano fizičko lice koje ispunjava:

a) opšte uslove:

- 1) da je državljanin Bosne i Hercegovine,
- 2) da ima opštu zdravstvenu sposobnost,
- 3) da protiv njega nije potvrđena optužnica,

b) posebne uslove:

1) da ima visoku stručnu spremu, odnosno završen prvi ciklus studija u trajanju od četiri godine sa ostvarenih najmanje 240 ECTS bodova ili ekvivalent,

2) da ima najmanje pet godina radnog iskustva sa traženim stepenom obrazovanja na poslovima u oblasti koju je kandidat naveo u prijavi,

3) da je uspješno završio provjeru znanja kroz opšti i posebni dio testiranja u skladu sa odredbama ovog zakona,

4) da ima položen stručni ili specijalistički ispit za obavljanje poslova ako je to u skladu sa posebnim propisima uslov za obavljanje tih poslova odnosno odgovarajuće odobrenje za samostalno obavljanje poslova (licencu).

(2) Ako za određenu oblast vještačenja nema lica koja ispunjavaju uslove iz stava (1) tačke b) podtačka 1), za vještaka može biti imenovano lice koje ima prvi ciklus studija sa ostvarenih najmanje 180 ECTS bodova ili ekvivalent i najmanje osam godina radnog iskustva sa traženim stupnjem obrazovanja na poslovima u oblasti koju je kandidat naveo u prijavi.

(3) Ako za određenu oblast vještačenja nema lica koje ispunjavaju uslove iz stava (1) tačke b) podtačka 1) i stava (2), za vještaka može biti imenovano lice koja ima srednju stručnu spremu i najmanje 15 godina radnog iskustva sa traženim stupnjem obrazovanja na poslovima u oblasti koju je kandidat naveo u prijavi.

(4) Izuzetno od stava (1) tačke b) podtačka 1) i stavova (2) i (3) za vještaka može biti imenovano lice koje je u prethodnom periodu bilo na listi vještaka najmanje 8 godina i u tom periodu po nalogu suda ili drugog organa sačinilo najmanje 5 nalaza i mišljenja.

(5) Za vještaka se ne može imenovati lice koje je osuđeno za krivično djelo na kaznu zatvora u trajanju dužem od šest mjeseci kao i za krivično djelo protiv uređenja i sigurnosti države, čovječnosti i međunarodnog prava, protiv službene ili druge odgovorne dužnosti, krivična djela izvršena iz koristoljublja ili drugih niskih pobuda niti lice koje je u posljednje tri godine od dana podnošenja prijave razriješeno dužnosti vještaka.

(6) Od obaveze kvalifikacionog testiranja - provjere posebnih (stručnih) znanja (posebni dio testiranja) iz stava (1) tačka b) podtačka 3) izuzima se kandidat koji ima zvanje doktora nauka iz oblasti vještačenja iz člana 2. ovog zakona za koju se prijavljuje kao i kandidat sa završenim medicinskim fakultetom i položenim

specijalističkim i/ili subspecijalističkim ispitom iz oblasti vještačenja za koju se prijavljuje za vještaka.

(7) Kandidat koji je oslobođen od postupka provjere posebnih (stručnih) znanja (posebni dio testiranja) iz prethodnog stava dužan je pristupiti testiranju iz oblasti poznavanja osnova organizacije sudske vlasti, funkcioniranja sudskih i drugih postupaka i uloge vještaka u tim postupcima (opšti dio testiranja).

(8) Ispunjenost uslova za oslobađanje u pogledu izuzetaka iz stava (6) se dokazuje odgovarajućom diplomom odnosno uvjerenjem nadležne ustanove obrazovanja.

(9) Kandidat koji je položio ispit za vještaka pred nadležnim organom u Bosni i Hercegovini oslobođen je obaveze provjere znanja iz stava (1) tačka b) podtačka 3), a što dokazuje odgovarajućom ispravom nadležnog organa.

Član 5. **(Podnošenje prijave za imenovanje vještaka)**

(1) Prijava za imenovanje vještaka podnosi se Stručnoj službi Pravosudne komisije.

(2) U prijavi se navodi oblast i odgovarajuća podoblast ili specijalnost za koju se podnosi prijava i uz istu dostavlja sljedeća dokumentacija:

- a) biografija,
- b) uvjerenje o državljanstvu,
- c) uvjerenje o opštoj zdravstvenoj sposobnosti,
- d) uvjerenje nadležnog suda da se ne vodi krivični postupak,
- e) popunjen i ovjeren formular izjave o nekažnjavanju (formular broj 1. u prilogu Zakona)
- f) ovjerena fotokopija diplome,
- g) uvjerenje o radnom iskustvu sa traženom stručnom spremom na poslovima u odgovarajućoj oblasti, podoblasti ili specijalnosti i
- h) dokaz o uplati troškova za imenovanje vještaka.

(3) Ako prijavu podnosi kandidat iz člana 4. stav (1) tačka b) podtačka 4) ili stava (9), uz prijavu i dokumentaciju iz prethodnog stava, dostavlja i dokaze o ispunjavanju tih uslova u ovjerenjima fotokopiji.

Član 6. **(Objavljivanje javnog poziva)**

(1) Pravosudna komisija može na prijedlog suda ili drugog organa objaviti Javni poziv za imenovanje vještaka iz one oblasti za kojom se ukaže potreba.

(2) Javni poziv iz stava (1) ostaje otvoren najmanje 30 (trideset) dana, a najduže 1 (jednu) godinu od dana objave u službenim glasnicima Bosne i Hercegovine i Brčko distrikta Bosne i Hercegovine.

(3) Javni poziv se, pored objave u službenim glasnicima iz prethodnog stava, objavljuje i na internet stranici Pravosudne komisije, a po potrebi i u lokalnim medijima.

Član 7. (Komisija za vještake)

(1) Radi provođenja procedure za imenovanje vještaka i postupanja po primjedbama na rad vještaka, Pravosudna komisija odlukom imenuje Komisiju za vještake (u daljnjem tekstu: Komisija).

(2) Komisija se sastoji od dva stalna člana i jednog privremenog.

(3) Stalni članovi se imenuju na period od dvije godine iz reda diplomiranih pravnika zaposlenih u pravosuđu, sa položenim pravosudnim ispitom i najmanje tri godine radnog iskustva nakon položenog pravosudnog ispita.

(4) Privremeni član se imenuje sa liste vještaka bilo kojeg nivoa u Bosni i Hercegovini ili iz reda univerzitetskih profesora iz područja nauka iz oblasti utvrđenih u članu 2. stav (6) za svaku pojedinačnu proceduru imenovanja vještaka ili postupanja po primjedbama na rad vještaka.

(5) Administrativno-tehničke poslove Komisije obavlja sekretar koji se imenuje iz reda diplomiranih pravnika zaposlenih u Stručnoj službi Pravosudne komisije.

(6) Komisija svoj posao obavlja izvan radnog vremena.

(7) Članovi Komisije i sekretar imaju pravo na naknadu za rad u skladu sa Zakonom o službenicima i namještenicima u pravosuđu Brčko distrikta Bosne i Hercegovine.

(8) Način rada i odlučivanja Komisije propisaće se poslovníkom o radu koji donosi Pravosudna komisija.

Član 8. (Testiranje kandidata za vještaka)

(1) Komisija utvrđuje da li je prijava potpuna.

(2) Prijavu koja nije potpuna Komisija odlukom odbacuje, a prijavu na osnovu koje Komisija utvrdi da kandidat ne ispunjava uslove za vještaka Komisija odlukom odbija. Protiv odluke o odbacivanju odnosno odbijanju prijave kandidat ima pravo žalbe Pravosudnoj komisiji u roku od 15 dana od dana prijema odluke.

(3) Pravosudna komisija u postupku odlučivanja po žalbi istu može odbiti kao neosnovanu ili žalbu uvažiti, odluku kojom se prijava kandidata odbacuje odnosno odbija ukinuti i naložiti Komisiji ponovno razmatranje prijave. Protiv odluke Pravosudne komisije kojom se žalba odbija može se pokrenuti upravni spor kod Osnovnog suda Brčko distrikta Bosne i Hercegovine (u daljem tekstu: Osnovni sud).

(4) Ako je prijava potpuna i kandidat ispunjava uslove za vještaka Komisija provodi testiranje kandidata iz oblasti poznavanja osnova organizacije sudske vlasti,

funkcionisanja sudskih i drugih postupaka i uloge vještaka u tim postupcima (opšti dio testiranja) kao i iz oblasti iz člana 2. stav (6) za koju se kandidat prijavljuje za vještaka (posebni dio testiranja) osim ako nije drugačije propisano ovim zakonom.

(5) Postupak, način i sadržaj (opšteg i posebnog dijela) testiranja kandidata reguliše se propisom o testiranju kandidata za vještaka kojeg donosi Pravosudna komisija.

(6) Komisija će pribaviti izvod iz kaznene evidencije radi provjere ispunjenosti uslova iz člana 4. stav 5) ovog zakona.

(7) Troškove testiranja snosi kandidat za vještaka i isti predstavljaju prihod Budžeta Brčko distrikta Bosne i Hercegovine.

(8) Odluku o visini troškova za imenovanje vještaka donosi Pravosudna komisija.

Član 9. (Imenovanje vještaka)

(1) Kandidat za vještaka se na testiranju ocjenjuje "zadovoljava" ili "ne zadovoljava".

(2) Komisija u roku od 3 dana od dana obavljenog testiranja daje prijedlog Pravosudnoj komisiji da se za vještaka imenuje kandidat koji je na testiranju dobio ocjenu "zadovoljava".

(3) Vještaka imenuje rješenjem Pravosudna komisija.

(4) Vještak iz stava (3) se imenuje na period od šest godina i upisuje u Imenik vještaka.

(5) Kandidatu koji je ocijenjen sa „ne zadovoljava“, Pravosudna komisija, u roku od 30 dana od dana prijema obrazloženog izjašnjenja Komisije, donosi rješenje kojim odbija njegovu prijavu za imenovanje.

(6) Protiv rješenja iz stava (5) može se pokrenuti upravni spor kod Osnovnog suda.

Član 10. (Produženje mandata vještaku)

(1) Po isteku perioda iz člana 9. stav (4) ovog zakona, Pravosudna komisija rješenjem produžava mandat vještaku na isti period ako u roku od 30 (trideset) dana prije isteka mandata podnese stručnoj službi Pravosudne komisije zahtjev za produženje mandata.

(2) Odluku o visini troškova za produženje mandata vještaku donosi Pravosudna komisija.

(3) Uz zahtjev se dostavljaju sljedeći dokumenti:

- popunjen i ovjeren formular izjave o ispunjavanju opštih i posebnih uslova (formular broj 2 u prilogu zakona – aneks zakona);

- popunjen i ovjeren formular izjave o nekažnjavanju (formular broj 3 u prilogu zakona – aneks zakona),
- uvjerenje o nevođenju krivičnog postupka,
- uvjerenje o opštoj zdravstvenoj sposobnosti,
- dokaz o uplati troškova za produženje mandata,
- dokaz o ispunjenosti uslova iz člana 27. ovog zakona i
- dokaz o edukaciji i stručnom usavršavanju tokom perioda prethodnog imenovanja.

(4) Zahtjev za produženje mandata koji nije blagovremen i/ili potpun Komisija odlukom odbacuje, a zahtjev za produženje mandata na osnovu koje Komisija utvrdi da kandidat ne ispunjava uslove za produženje mandata Komisija odlukom odbija. Protiv odluke o odbacivanju odnosno odbijanju zahtjeva za produženje mandata kandidat ima pravo zaštite na način propisan odredbom člana 8. stavovi (2) i (3) ovog zakona.

(5) Vještaka čiji mandat nije produžen Pravosudna komisija briše sa Liste vještaka.

Član 11. (Svečana izjava)

(1) Lice koja je imenovano za vještaka, prije početka vršenja dužnosti, potpisuje u Pravosudnoj komisiji svečanu izjavu (Aneks I zakona) u roku od 30 dana od dana prijema Rješenja o imenovanju.

(2) Tekst svečane izjave glasi: “Izjavljujem da ću dužnost vještaka vršiti časno i savjesno i da ću u radu postupati u skladu sa zakonom i drugim propisima i pravilima struke“.

Član 12. (Imenik vještaka)

(1) Stručna služba Pravosudne komisije vodi Imenik vještaka.

(2) U Imenik vještaka unose se sljedeći podaci:

- a) redni broj upisa,
- b) ime i prezime vještaka i JMB,
- c) prebivalište i adresa stanovanja,
- d) telefonski broj,
- e) stručno zvanje, kao i oblast imenovanja, uključujući odgovarajuću podoblast ili specijalnost,
- f) broj i datum rješenja o imenovanju i
- g) evidencija o zapažnjima i izrečenim mjerama.

(3) Način vođenja Imenika vještaka, sadržaj i izgled obrasca Imenika vještaka propisaće Pravosudna komisija.

Član 13.
(Sadržaj i objavljivanje Liste vještaka)

(1) Na osnovu podataka iz Imenika vještaka Pravosudna komisija sačinjava Listu vještaka koja sadrži:

- 1) ime i prezime vještaka,
- 2) prebivalište i adresu vještaka,
- 3) telefonski broj,
- 4) stručni naziv zvanja vještaka,
- 5) oblast, odgovarajuću podoblast ili specijalnost za koju je vještak imenovan i
- 6) period imenovanja

(2) Lista vještaka i sve promjene, objavljuju se u "Službenom glasniku Brčko distrikta Bosne i Hercegovine" i na službenoj internet stranici Pravosudne komisije.

(3) Lista vještaka je obavezujuća za sud ili drugi organ koji vodi postupak, osim ako je drugačije propisano zakonom kojim se uređuju pravila postupka ili ovim zakonom.

Član 14.
(Promjena podataka)

(1) Vještak je dužan o prestanku ispunjavanja uslova iz člana 4. stav (1), kao i promjeni podataka iz članova 12. i 13. ovog zakona, obavijestiti Stručnu službu Pravosudne komisije bez odgađanja, a najkasnije u roku od osam dana od dana prestanka ispunjavanja uslova odnosno promjene podataka.

(2) Postupanje suprotno prethodnom stavu predstavlja povredu zbog koje se može izreći jedna od mjera propisanih odredbom člana 31. ovog zakona.

Član 15.
(Pečat)

(1) Vještak ima pečat okruglog oblika, promjera 38 milimetara, koji se može upotrebljavati samo u vršenju dužnosti vještaka.

(2) Tekst pečata ispisan je latiničnim i ćiriličnim pismom i na jednom od jezika koji su u službenoj upotrebi u Brčko distriktu Bosne i Hercegovine i sadrži:

- a) ime i prezime vještaka,
- b) oznaku "vještak" sa naznakom oblasti, podoblasti ili specijalnosti vještačenja za koju je vještak imenovan i
- c) mjesto prebivališta vještaka.

(3) Prije početka vršenja dužnosti vještak deponuje otisak pečata i svojeručni potpis u Stručnoj službi Pravosudne komisije u roku od 30 dana od prijema rješenja o imenovanju.

(4) Troškove izrade i nabavke pečata snosi vještak.

Član 16.
(Službena legitimacija)

- (1) Vještak ima službenu legitimaciju kojom dokazuje svojstvo vještaka.
- (2) Službenu legitimaciju vještaku izdaje predsjednik Pravosudne komisije.
- (3) Obrazac službene legitimacije uređuje se posebnom odlukom Pravosudne komisije.

Član 17.
(Evidencija službenih legitimacija)

- (1) Stručna služba Pravosudne komisije vodi evidenciju o izdanim službenim legitimacijama iz člana 16. ovog zakona.
- (2) Evidencija iz stava (1) sadrži redni broj, ime i prezime vještaka kojem je izdata službena legitimacija, jedinstveni matični broj (JMB), datum izdavanja, vrijeme trajanja ovlaštenja, datum i razlog privremenog oduzimanja i rubriku za napomene.

Član 18.
(Oduzimanje i poništavanje službene legitimacije)

Službena legitimacija oduzima se vještaku kada mu je izrečena privremena zabrana obavljanja poslova vještačenja, a poništava se kada mu prestane pravo na obavljanje poslova vještaka.

Član 19.
(Gubitak službene legitimacije)

- (1) Ako vještak izgubi službenu legitimaciju ili na drugi način ostane bez nje, dužan je o tome bez odgađanja obavijestiti stručnu službu Pravosudne komisije radi pokretanja postupka za brisanje nestale službene legitimacije iz evidencije i izdavanja nove.
- (2) U slučaju iz stava (1) vještak je dužan službenu legitimaciju oglasiti nevažećom u „Službenom glasniku Brčko distrikta Bosne i Hercegovine“ i podnijeti zahtjev za izdavanje nove legitimacije.
- (3) Nova službena legitimacija pod drugim rednim brojem izdaće se vještaku nakon što izgubljena ili na drugi način nestala službena legitimacija bude oglašena nevažećom.

III DIO - PRAVA I OBAVEZE VJEŠTAKA

Član 20.
(Nezavisnost u radu vještaka)

Vještak je samostalan i nezavisan u obavljanju vještačenja i u radu je dužan pridržavati se zakona i drugih propisa, pravila struke i domaćih i međunarodnih standarda.

Član 21.
(Tarifa o nagradi i naknadi troškova za rad vještaka)

- (1) Vještak ima pravo na nagradu za obavljeno vještačenje i naknadu troškova nastalih u vezi sa vršenjem poslova vještaka, u skladu sa odredbama Tarife o nagradi i naknadi troškova za rad vještaka (u daljem tekstu: Tarifa).
- (2) Tarifa iz stava (1) propisuje nagradu za obavljeno vještačenje i naknadu za troškove nastale vršenjem poslova vještaka (troškove službenog putovanja, smještaja i slično).
- (3) Tarifu donosi Pravosudna komisija.
- (4) Tarifa se objavljuje u „Službenom glasniku Brčko distrikta Bosne i Hercegovine“ i na internet stranici Pravosudne komisije.
- (5) Sudovi i drugi organi u odluci o troškovima postupka određuju nagradu i naknadu za izvršene poslove vještačenja prema odredbama Tarife koja je važila u vrijeme vršenja poslova vještačenja, osim ako nije drugačije propisano pravilima postupka.
- (6) U slučajevima u kojima je sud ili drugi organ dužan naknaditi troškove vještačenja, isti se imaju izmiriti u roku od 60 dana od dana donošenja odluke kojom je utvrđena visina nagrade i naknade troškova vještaka.

Član 22.
(Dnevnik izvršenih vještačenja)

- (1) Vještak je dužan voditi Dnevnik izvršenih vještačenja (u daljem tekstu: Dnevnik).
- (2) U Dnevnik se unose sljedeći podaci:
 - a) redni broj upisa,
 - b) prepis akta suda ili drugog organa koji vodi postupak, odnosno pravnog lica na čiji se zahtjev vrši vještačenje,
 - c) ime, prezime i adresa lica koje zahtijeva vještačenje i datum kada je zahtjev podnesen,
 - d) predmet vještačenja i kratak opis sadržaja vještačenja i
 - e) iznos obračunate i naplaćene nagrade i naknade troškova vještačenja.
- (3) Vještak je dužan na zahtjev Pravosudne komisije omogućiti uvid u Dnevnik.

Član 23.
(Dužnost vršenja poslova vještačenja i obaveza poštovanja rokova)

- (1) Vještak je dužan izvršiti vještačenje koje naloži sud ili drugi organ koji vodi postupak uz obavezu poštovanja roka koji mu je određen.
- (2) Ako vještak iz objektivnih razloga ne može izvršiti vještačenje u roku iz stava (1) dužan je podnijeti sudu ili drugom organu koji je odredio vještačenje bez odgađanja, a najkasnije 15 dana prije isteka roka izvještaj o razlozima zbog kojih nije u mogućnosti

izvršiti vještačenje, kratki prikaz rezultata do tada obavljenih radnji, kao i navesti rok do kada će obaviti vještačenje.

(3) U složenijim vještačenjima u kojima je određen duži rok za vještačenje, sud ili drugi organ koji je odredio vještačenje može tražiti izvještaj o rezultatima do tada obavljenih radnji.

Član 24. (Nemogućnost postupanja)

Ako vještak iz opravdanih razloga ne može prihvatiti vještačenje, dužan je o tome obavijestiti sud ili drugi organ koji vodi postupak, bez odgađanja, a najkasnije u roku od tri dana od dana prijema odluke kojom je određen za vještaka.

Član 25. (Čuvanje tajne)

(1) Vještak je dužan čuvati kao tajnu sve ono što je saznao u obavljanju poslova vještaka.

(2) Saznanja iz stava (1) vještak može iznositi samo u okviru vršenja dužnosti vještaka.

(3) Pravosudna komisija može osloboditi vještaka obaveze čuvanja tajne ako u pojedinom slučaju za to postoje opravdani razlozi.

Član 26. (Edukacija i stručno usavršavanje vještaka)

(1) Vještaci su obavezni edukovati se i stručno usavršavati.

(2) Edukaciju vještaka organizuje i provodi Pravosudna komisija.

(3) Pravilnik o edukaciji vještaka kojim se propisuju način, postupak i sadržaj organizacije i provođenja edukacije vještaka, donijeće Pravosudna komisija.

(4) Dokaz o stručnom usavršavanju vještak je dužan dostaviti Pravosudnoj komisiji najmanje jednom u toku trajanja mandata.

(5) Postupanje suprotno stavu (1) predstavlja povredu zbog koje se može izreći jedna od mjera propisana odredbom člana 31. ovog zakona.

Član 27. (Obavezno osiguranje od odgovornosti)

(1) Vještak je dužan osigurati se od odgovornosti za štetu pričinjenu trećim licima zbog vršenja poslova vještačenja protivno zakonu i drugom propisu, pravilima struke i domaćim i međunarodnim standardima.

(2) Vještak je obavezan zaključiti ugovor o osiguranju od odgovornosti sa društvom za osiguranje, za tekuću godinu.

(3) Na početku svake kalendarske godine, najkasnije do 31. januara, vještak je dužan Stručnoj službi Pravosudne komisije dostaviti dokaz o zaključenom ugovoru o osiguranju za tekuću godinu.

(4) Izuzetno od prethodnog stava, ako se radi o imenovanju iz člana 9. stav (3) ovog zakona, vještak je dužan dokaz o zaključenom ugovoru o osiguranju dostaviti u roku od 30 dana od dana prijema rješenja o imenovanju.

(5) Minimalni iznos osiguranja iznosi 100.000,00 KM (sto hiljada konvertibilnih maraka).

IV DIO – NADZOR NAD RADOM VJEŠTAKA

Član 28.

(Nadzor nad radom vještaka od organa koji vodi postupak)

(1) Sud ili drugi organ koji vodi postupak dužni su pratiti rad vještaka i o svojim zapažanjima po potrebi obavještavati Pravosudnu komisiju.

(2) Sud ili drugi organ koji vodi postupak dužni su o izrečenim mjerama obavještavati Pravosudnu komisiju.

(3) Sud ili drugi organ koji vodi postupak postupiće na način propisan stavom (1) i u slučaju kada je primjenjujući pravila postupka zbog nepropisnog ponašanja vještaka odredio drugog vještaka u postupku.

(4) Sud ili drugi organ koji vodi postupak je dužan bez odgađanja obavijestiti Pravosudnu komisiju o potvrđivanju optužnice protiv lica koje ima status vještaka i o pravosnažnoj odluci kojom je krivični postupak okončan.

Član 29.

(Primjedba na rad vještaka)

(1) Sud ili drugi organ koji vodi postupak mogu Pravosudnoj komisiji dostaviti primjedbu na rad vještaka koja se odnosi na kršenje zakona ili drugih propisa, pravila struke, domaćih ili međunarodnih standarda, te predlagati utvrđivanje odgovornosti vještaka u skladu sa ovim zakonom.

(2) Primjedbu na rad vještaka iz stava (1) mogu podnijeti i stranke i punomoćnici stranaka.

(3) Primjedbe iz stavova (1) i (2) trebaju sadržavati činjenične navode podnosioca primjedbe, sa potrebnom dokumentacijom koja potkrepljuje te navode i iste se dostavljaju vještaku radi izjašnjenja.

Član 30.
(Postupanje po primjedbama na rad vještaka)

(1) Primjedbe iz člana 29. Pravosudna komisija dostavlja Komisiji radi razmatranja i predlaganja odgovarajućih mjera u skladu sa članom 31. ovog zakona.

(2) Po prijemu primjedbe Komisija će pokrenuti i provesti postupak utvrđivanja odgovornosti vještaka u skladu s propisom kojim se uređuje postupak utvrđivanja odgovornosti vještaka koji donosi Pravosudna komisija.

Član 31.
(Povrede i mjere)

U slučajevima kada Komisija utvrdi da je vještak prilikom obavljanja poslova vještačenja prekršio zakon ili drugi propis, pravila struke, domaće ili međunarodne standarde, Pravosudna komisija na prijedlog Komisije rješenjem izriče jednu od sljedećih mjera:

- a) pismenu opomenu,
- b) javnu opomenu, koja se bez odgađanja objavljuje u „Službenom glasniku Brčko distrikta Bosne i Hercegovine“,
- c) zabranu obavljanja poslova vještačenja u trajanju od jedne do tri godine i
- d) razrješenje vještaka.

Član 32.
(Načela izricanja mjera)

Prilikom izricanja mjera iz člana 31. ovog zakona naročito se uzimaju u obzir sljedeće okolnosti:

- a) vrsta i težina učinjene povrede u vršenju poslova vještačenja i njene posljedice,
- b) stepen odgovornosti,
- c) okolnosti pod kojima je povreda učinjena,
- d) dosadašnji rad i ponašanje vještaka,
- e) ranije izrečene mjere prema vještaku i
- f) druge okolnosti koje mogu uticati na odluku o vrsti mjere.

Član 33.
(Pravo na pravni lijek)

Protiv rješenja o izricanju mjere iz člana 31. ovog zakona može se pokrenuti upravni spor kod Osnovnog suda.

Član 34.
(Privremena zabrana obavljanja poslova vještačenja)

(1) Ako protiv vještaka tokom trajanja mandata bude potvrđena optužnica, Pravosudna komisija će donijeti rješenje kojim će vještaku privremeno zabraniti obavljanje poslova vještačenja.

(2) Zabrana obavljanja poslova iz stava (1) trajaće do pravosnažnog okončanja krivičnog postupka.

Član 35.
(Prestanak mandata vještaka)

(1) Vještaku prestaje mandat:

- a) smrću
- b) razrješenjem

(2) Vještaka razrješava Pravosudna komisija:

- a) na lični zahtjev,
- b) ako se naknadno utvrdi da ne ispunjava opšte i posebne uslove iz člana 4. ovog zakona,
- c) gubitkom poslovne sposobnosti,
- d) ako je pravosnažno osuđen za krivično djelo iz člana 4. stav (5) ovog zakona,
- e) ako mu je sud ili drugi organ koji vodi postupak izrekao novčanu kaznu tri puta u jednoj kalendarskoj godini,
- f) ako ne postupi u skladu sa obavezom iz člana 11 i/ili 15 ovog zakona.
- g) ako je sud ili drugi organ koji vodi postupak, iz razloga koji nisu propisani članom 23. stav (2) i članom 24. ovog zakona, odredio drugog vještaka dva puta u jednoj kalendarskoj godini,
- h) ako ne postupi u skladu sa odredbom člana 27. ovog zakona i
- i) u slučaju izricanja mjere iz člana 31. tačka d) ovog zakona.

(3) U postupku razrješenja vještaka, Pravosudna komisija može zatražiti izjašnjenje vještaka o činjenicama i okolnostima na osnovu kojih je pokrenut postupak razrješenja.

(4) Protiv rješenja o razrješenju iz stava (2) može se pokrenuti upravni spor kod Osnovnog suda.

(5) Vještak kome je prestao mandat briše se sa Liste vještaka, a što se bez odgađanja objavljuje u „Službenom glasniku Brčko distrikta Bosne i Hercegovine“.

V DIO – ORGANI VLASTI, JAVNE USTANOVE I PRAVNA LICA KOJI OBAVLJAJU POSLOVE VJEŠTAČENJA

Član 36.
(Organi vlasti i javne ustanove koji obavljaju poslove vještačenja)

Vještačenje mogu vršiti organi vlasti i javne ustanove u Bosni i Hercegovini koji su zakonom ili drugim propisom ovlašteni da vrše poslove vještačenja.

Član 37.
(Pravna lica koja obavljaju poslove vještačenja)

Obavljanje vještačenja u jednoj ili više oblasti može vršiti privatna ustanova ili privredno društvo u skladu sa posebnim propisom kojim se uređuje njihovo osnivanje i rad.

Član 38.
(Uslovi za upis u Imenik)

(1) Organi vlasti i javne ustanove u Bosni i Hercegovini upisuju se na zahtjev u Imenik organa vlasti, javnih ustanova i pravnih lica koji obavljaju poslove vještačenja (u daljem tekstu: Imenik) koji vodi Stručna služba Pravosudne komisije, ako su zakonom ovlašteni za obavljanje poslova vještačenja i imaju zaključen ugovor o osiguranju od odgovornosti za obavljanje poslova vještačenja.

(2) Pravno lice iz člana 37. ovog zakona podnosi zahtjev za upis u Imenik i dostavlja dokaze o ispunjavanju opštih i posebnih uslova za vršenje poslova vještačenja.

(3) Opšti uslovi za vršenje poslova vještačenja za pravno lice:

a) da je registrovano kod nadležnog suda za obavljanje poslova vještačenja za određenu oblast i

b) da ima dozvolu za početak obavljanja djelatnosti ako je to posebnim zakonom propisano.

(4) Posebni uslovi za vršenje poslova vještačenja za pravno lice:

a) da ima zaključen ugovor o radu ili ugovor o djelu sa najmanje dva angažovana stručna lica koja su na listi vještaka u Bosni i Hercegovini za oblasti vještačenja za koju podnosi zahtjev i

b) da ima zaključen ugovor o osiguranju od odgovornosti za obavljanje poslova vještačenja.

(5) Pravosudna komisija donosi rješenje o upisu u Imenik.

Član 39.
(Sadržaj Imenika)

(1) U Imenik se unose sljedeći podaci:

- a) redni broj upisa,
- b) naziv i sjedište,
- c) telefonski broj,
- d) oblast, podoblast i specijalnost vještačenja,
- e) imena stručnih lica kojima pravno lice raspolaže za određenu oblast vještačenja,
- f) broj i datum rješenja o upisu u sudski registar,
- g) broj i datum donošenja rješenja o upisu u Imenik i
- h) evidencija o zapažanjima i izrečenim mjerama

(2) Način vođenja Imenika, sadržaj i izgled obrasca Imenika propisaće Pravosudna komisija.

Član 40.
(Sadržaj i objavljivanje Liste)

(1) Na osnovu podataka iz Imenika Pravosudna komisija sačinjava Listu organa vlasti, javnih ustanova i pravnih lica koji obavljaju poslove vještačenja (u daljem tekstu: Lista) koja sadrži:

- 1) naziv,
- 2) sjedište i adresu,
- 3) telefonski broj,
- 4) oblast, odgovarajuću podoblast ili specijalnost vještačenja i
- 5) period imenovanja.

(2) Lista i sve promjene se objavljuju u „Službenom glasniku Brčko distrikta Bosne i Hercegovine“ i na službenoj internet stranici Pravosudne komisije.

(3) Lista je obavezujuća za sud ili drugi organ koji vodi postupak, osim ako je drugačije propisano zakonom kojim se uređuju pravila postupka ili ovim zakonom.

Član 41.
(Prestanak ispunjavanja uslova i promjena podataka)

Organi vlasti, javne ustanove i pravna lica koja su upisana u Imenik, dužni su o prestanku ispunjavanja uslova iz člana 38., kao i promjeni podataka iz članova 39. i 40. ovog zakona obavijestiti Stručnu službu Pravosudne komisije bez odgađanja, a najkasnije u roku od osam dana od dana prestanka ispunjavanja uslova odnosno promjene podataka.

Član 42.
(Rješenje o brisanju sa Liste)

(1) Ako je pravno lice registrovano za vršenje poslova vještačenja, prestalo ispunjavati uslove za upis u Imenik, odnosno ako na osnovu zakona prestane ovlaštenje organa vlasti i javnih ustanova za vršenje poslova vještačenja ili ako ne postupe u skladu sa članom 41. ovog zakona, Pravosudna komisija donosi rješenje o brisanju sa Liste, što se bez odgađanja objavljuje u „Službenom glasniku Brčko distrikta Bosne i Hercegovine“.

(2) Protiv rješenja iz stava (1) može se pokrenuti upravni spor kod Osnovnog suda.

Član 43.
(Dužnost vršenja poslova vještačenja i obaveza poštovanja rokova)

(1) Organi vlasti, javne ustanove i pravna lica upisana u Imenik, dužni su izvršiti vještačenje koje naloži sud ili drugi organ koji vodi postupak i obavezni su pridržavati se roka koji im je određen.

(2) Ako organ vlasti, javna ustanova i pravno lice ne mogu iz opravdanih razloga prihvatiti vještačenje, dužni su bez odgađanja, a najkasnije u roku od tri dana od dana prijema odluke o određivanju vještačenja, obavijestiti sud ili drugi organ koji vodi

postupak o razlozima neprihvatanja, osim ako nije drugačije propisano pravilima postupka.

(3) Ako organ vlasti, javna ustanova i pravno lice iz objektivnih razloga ne mogu izvršiti vještačenje u roku iz stava (1), dužni su podnijeti sudu ili drugom organu koji je odredio vještačenje bez odgađanja, a najkasnije 15 dana prije isteka roka izvještaj o razlozima zbog kojih nisu u mogućnosti izvršiti vještačenje, kratki prikaz rezultata do tada obavljenih radnji, kao i navesti rok do kada će obaviti vještačenje, osim ako nije drugačije propisano pravilima postupka.

(4) U složenijim vještačenjima u kojima je određen duži rok za vještačenje, sud ili drugi organ koji je odredio vještačenje može tražiti izvještaj o rezultatima do tada obavljenih radnji, osim ako nije drugačije propisano pravilima postupka.

Član 44. (Obavezno osiguranje od odgovornosti)

(1) Organ vlasti, javna ustanova i pravno lice koje je upisano u Imenik, dužni su osigurati se od odgovornosti za štetu pričinjenu trećim licima zbog vršenja poslova vještačenja protivno zakonu i drugom propisu, pravilima struke i domaćim i međunarodnim standardima.

(2) O obaveznom osiguranju iz stava (1) zaključiće se ugovor o osiguranju od odgovornosti sa društvom za osiguranje, za tekuću godinu.

(3) Na početku svake kalendarske godine, najkasnije do 31. januara, organ vlasti, javna ustanova i pravno lice koji su upisani u Imenik, dužni su Stručnoj službi Pravosudne komisije dostaviti dokaz o zaključenom ugovoru o osiguranju za tekuću godinu.

(4) Minimalni iznos osiguranja iznosi 200.000 KM (dvije stotine hiljada konvertibilnih maraka).

Član 45. (Shodna primjena odredbi o vještacima)

Odredbe ovog zakona koje se odnose na vještaka, shodno se primjenjuju i na organe vlasti, javne ustanove i pravna lica koja obavljaju poslove vještačenja.

VI DIO - PRELAZNE I ZAVRŠNE ODREDBE

Član 46. (Imenovanje vještaka po odredbama ovog zakona)

(1) Vještaci imenovani u skladu sa odredbama Pravilnika o stalnim sudskim vještacima u Brčko distriktu BiH („Službeni glasnik Brčko distrikta Bosne i Hercegovine“, broj: 15/20) nastavljaju da obavljaju dužnost vještaka u skladu sa ovim zakonom do isteka mandata na koji su imenovani.

(2) Vještaci iz stava (1) mogu biti ponovo imenovani shodno odredbi člana 10., u kom slučaju nisu dužni pristupiti provjeri znanja kroz opšti i posebni dio testiranja iz člana 4. stav (1) tačka b) podtačka (3) ovog zakona.

Član 47. (Donošenje podzakonskih propisa)

(1) Pravosudna komisija će u roku od 180 dana od dana stupanja na snagu ovog zakona donijeti sljedeće propise i akte i to:

- a) Poslovnik o radu Komisije (član 7. stav (8)),
- b) propis o testiranju kandidata za vještaka (član 8. stav (5)),
- c) propis o načinu vođenja imenika, sadržaju i izgledu obrasca imenika (član 12. stav (3) i član 39),
- d) Odluku o obrascu službene legitimacije (član 16. stav (3)),
- e) Tarifa o nagradi i naknadi troškova za rad vještaka (član 21. stav (3)),
- f) Pravilnik o edukaciji vještaka (član 26. stav (3)) i
- g) propis kojim se uređuje postupak utvrđivanja odgovornosti vještaka (član 30. stav (2)).

(2) Do donošenja podzakonskih propisa iz stava (1) shodno se primjenjuju odgovarajuće odredbe Pravilnika o stalnim sudskim vještacima u Brčko distriktu BiH („Službeni glasnik Brčko distrikta Bosne i Hercegovine“, broj: 15/20) ako nisu u suprotnosti sa ovim zakonom.

Član 48. (Shodna primjena)

Na pitanja postupka koja nisu uređena ovim zakonom primjenjuju se odredbe Zakona o upravnom postupku Brčko distrikta BiH.

Član 49. (Prestanak važenja propisa)

Stupanjem na snagu ovog zakona stavlja se van snage član 62. Zakona o sudovima Brčko distrikta Bosne i Hercegovine – prečišćeni tekst („Službeni glasnik Brčko distrikta Bosne i Hercegovine“, broj: 18/20).

Član 50. (Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.

Broj:
Brčko, godine

PREDSJEDNIK
SKUPŠTINE BRČKO DISTRIKTA
BOSNE I HERCEGOVINE

Damir Bulčević